

MUSICA

LA VELA PUERCA DA RETURN

A CUIRA

da H.



Per differenta glieud han els num ils portgs che sgolan, per outra ils joints sgulants e per anc outra simplamain ils «churros». Danunder ch'ìl num La Vela Puerca deriva e tge che quel num signifitgescha, n'è betg uschè cler. La band na dat nagina dretga resposta a quella dumonda, uschia ch'ìgl ans resta nagut auter che dad interpretar il num sco quai che nus vulain.

L'emprima giada che jau sun vegnì en contact cun quel num era ils 20-3-2003. Da quel temp frequentava jau anc la Scuola chantunala a Cuira ed els, la band da ska-latino, èn vegnids a sa preschentar en il Safari Beat Club. Per x-in motiv, dal qual jau na ma poss betg pli regurdar, n'hai jau betg pudì frequentar quel concert. 5 onns èn lura passads fin che jau hai udì quel num che tunava uschè exotic en mias ureglias per la segunda, terza, quarta giada – gea, per entirs quatter mais a la lunga hai jau mo udì da las velas puercas, sche nus discurrevan da musica. En quels quatter mais sun jau stà sin viadi en l'Argentina, Chile e Bolivia e tuts conuschevan quella band che mo gist ils insiders conuschevan en Svizra.

Ils portgs han prendì dapart la Selig

In onn suenter mias experientschas cun las istorgias ed ils raquints da la band en l'America dal Sid n'era sa midà nagut qua en Svizra. Be ils insiders savevan tgi ch'ìls Uruguaians eran e quels èn lura era stads ils 29 da matg en la Selig Tanzbar. La Vela Puerca da return a Cuira!!!!!! Quel maletg as stuais imaginar! La Vela Puerca, els che emplen-schan en Argentinia stadions da ballape, èn qua a Cuira en la Selig che toffa – dapi ch'ìns na dastga betg pli fimar – pli fitg da suaditsch e biera.

In auter exempel per la differenza tranter preschentaziuns en l'America dal Sid e la Svizra è forsa quella: il manager dals portgs sgulants ha dumandà per e-mail il possessur da la Selig, sch'els hajan gia empustà la tribuna da 13 meters. La risposta è stada ch'els na sajan betg ad in open air, mabain en ina bar amez las Alps da la Svizra. Quella bar han ils

9 commembers da la band però prendì dapart uschè sco quai ch'els fan vi sur la mar. Passa duas uras e mesa han els sunà, chantà, bavì biera, fimà!!! e transformà la Selig sco lieu d'inscunter dals sturns giuvenils da las muntognas grischunas che sautan tar beats da hiphop e drum'n'bass en ina Selig da sturns giuvenils svizzers, uruguaians ed argentins che sautan tar ils beats da ska e rock alternativ.

E durant l'entir concert tunavi adina puspè: «Vamos, vamos morena. Vamos morena de mi corazón.»

H. aka **Adrian Stecher** (23) è student da las ciencias da medias e communicaziun a Friburg. Il plaschair per la musica al ha gia tschiffà d'uffant. Il bab è organist e la mamma sunava excellentamain la flauta, uschia ch'el ha sunà sur blers onns il triangul. Per el è musica insatge che unescha, perquai na pudess el betg imaginar ina vita senza musica. Per las PUNTS va el a la tschertga da novas bands naziunales ed internaziunales e rapporta da concerts, albums ed experientschas fatgas cun la musica. Per il Radio Rumantsch moderescha Adrian tranter auter mintga segunda sonda la parada da hits.